



Mahein Nian Lian Nú. 36, 29 Juñu 2012

## Partidu Polítiku Sira Nian Polítika Ba Seitor Defeza no Siguransa Periodu 2012-2017

### Introdusaun

Iha prinsípiu fundamental ne'ebé hakerek iha Konstituisaun Repúblika Demokrátika Timor-Leste, artigu 7 ne'ebé deskrebe kona-bá sufraziu universal no multipartidarizmu ne'ebé estadu fó valór bá partidu polítiku sira nia kontribuisaun bá povu atu hatudu nia vontade organizadamente no bá sidadaun sira atu partisipa iha país nia governasaun.<sup>1</sup> Iha eleisaun parlamentar periodu 2012-2017, partidu polítika sira ne'ebé rijistadu iha *Comissão Nacional de Eleições* (CNE) hamutuk partidu 21 no koaligasaun sira. Partidu hirak ne'e kompostu husi Partidu União Democrático Timorese (UDT), Partidu Repúblikanu (PR), Partidu Desenvolvimento Nacional (PDN), Aliansa Demokrátiku (AD) KOTA/TRABALHISTA, Partidu Unidade Nacional (PUN), Partidu Democrático (PD), Partidu Timorese Democrático (PTD), Partidu Social Democráta (PSD), FRENTI-MUDANCA, Partidu Kmanek Haburas Unidade Nacional Timor-Oan (KHUNTO), Congresso Nacional de Reconstrução de Timor-Leste (CNRT), Frente Revolucionaria de Timor-Leste Independente (FRETILIN), Partidu Desenvolvimento Popular (PDP), BLOCO PROCLAMADOR PMD/PARENTIL, Associação Socialista Democráta Timorese (ASDT), Partidu Socialista Timorese (PST), Partidu Democrático Cristão (PDC), Partidu Democrático Liberal (PDL), Associação Popular Monarkia Timorese (APMT), Unidade Nacional da Resistencia Timorese (UNDERTIM), Coaligação PLPA/PDRT.<sup>2</sup>

Sai hanesan asuntu importante iha relatoriu ne'e, sei diskute kona-bá dezenvolvimentu setor defeza no siguransa ne'ebé dezenvolve dadauk inklui halo análise bá partidu xave sira ne'ebé iha potencia atu kaer ukun nia programa bá setor defeza no siguransa no saida mak sai hanesan prioridade bá setor defeza no siguransa nia dezenvolvimentu. Ho intensaun atu bele garante soberania estadu nian nu'udár komponenti importante ida atu aseguara povu nia moris ne'ebé konstitui iha konstituisaun Timor-Leste nian.<sup>3</sup>

### Metodolojia

Peskiza ida ne'e, Fundasaun Mahein (FM) liu husi *Security Sector Discussion* (SSD) hanesan diskusaun kona-bá topiku sira bá setor defeza no siguransa nian ne'ebé hala'o semana ida dala rua, durante oras ida. Husi diskusaun ne'e identifika partidu polítiku ne'ebé potensial atu forma governu. Rezultadu diskusaun ne'e identifika partidu tolu maka partidu FRETILIN, CNRT no PD. Nune'e mos partidu polítiku ki'ik ida maka PUN hanesan partidu ki'ik ida nia asentu iha Parlamentu Nasional periodu 2007-2012.

<sup>1</sup> Konstituisaun Repúblika Demokrátika Timor-Leste. Artigu 7, número 2.

<sup>2</sup> <http://www.cne.tl/includes/publications/Parliament%20Election%202012.pdf>

<sup>3</sup> Konstituisaun Repúblika Demokrátika Timor-Leste. Artigu 146 no 147.

Hafoin identifikaun bá partidu potensial sira, FM hala'o mos entrevista ho autor partidu polítiku sira ne'ebé responsavel bá programa setor defeza no siguransa nian. Iha entrevista ho Sekretariu Estadu Defeza no Sekretariu Estadu Siguransa ne'ebé responsavel bá setor defeza no siguransa iha governasaun 2007-2012. Hanesan komparasaun entre progresu dezenvolvimentu setor defeza no siguransa nian ho partidu polítiku nia programa. FM mos halo mos estudu bá dokumentu setor defeza no siguransa nian ne'ebé relevente ho topiku peskiza nian. FM halo mos diskusaun ho ánalizador seitor defeza no siguransa nian inklui asesor internasional sira ne'ebé tau matan bá setor defeza no siguransa. Ikus liu, FM halo ánaliza bá programa partidu polítiku sira nian bá setor defeza no siguransa no ajusta ho dezenvolvimentu setor rua nian ho pontu konsiderasaun sira ne'ebé konsidera hanesan dezafiu bá setor defeza no siguransa.

## **Partidu Polítiku Sira Nia Polítika Bá Setor Defeza no Siguransa**

### **1. Partidu FRETILIN<sup>4</sup>**

FRETILIN la konkorda ho konsentrasaun setor siguranga ho defeza iha liman ida de'it. FRETILIN sei haketak ida ne'e ministériu defeza ho ministériu siguransa ida nivel ministérial la'os nivel sekretaria estadu. Tanba instituisaun defeza no siguransa iha ona problema barak iha nivel koordenasau instituisaun nian entre Ministériu Defeza no Siguransa, sekretariu estadu sira no komandu PNTL no F-FDTL. FRETILIN konsidera setor defeza no siguransa hanesan setor esensial ida, tanba ne'e setor rua ne'e la'os iha ministériu ida de'it hodi jere husi sekretariu estadu sira, FRETILIN konsidera hanesan nivel direktur nasional ida.

- **PNTL**

Urjenti mak setor siguransa, iha komprimisu polítika partidu FRETILIN nia pozisaun, iha área orden públika no kombat kriminalidade ne'e dehan atu evita krime no mantein orden públika. Ida ne'e bá ami aktulidade, estadu tenki estabelese fila fali lei no orden tenki garante maibé ida ne'e tenki iha vontade polítiku ida atu kombat krime iha nivel hotu-hotu. Tanba atu mantein lei no orden ne'e, hotu-hotu tenki fiar katak lei maka iha ema hotu nia leten. FRETILIN tenik, luta kontra kriminalidade ne'e "kondisaun implikavel bá orden públika no siguransa públika."

FRETILIN hare iha mos dezafiu sira boot tebes bá Timor-Leste ne'ebé hahu mai husi krime organizadu ekonomiku. FRETILIN fo prioridade reestabelese autoridade estadu liu husi reforsa lei no orden. Primeriu liu mak PNTL, tanba ne'e mak PNTL tenki iha meius umanu no materiais. Esensial atu hala'o sira nia serbisu ne'e tenki garante, tanba ita hare alokasaun rekursu la duun valansadu iha tinan hira liu bá ne'e osan barak tebes gasta iha PNTL maibé balun simu orsamentu bo'ot no benefisiu bo'ot liu, balun lae. Ezemplu, Sesaun Investigasaun Kriminal ne'e importante atu reforsa lei no orden, maibé, la iha orsamentu ne'ebé naton atu hala'o sira nia serbisu, dala barak apoiu mai husi doador sira. Investigasaun polisia, FRETILIN tenki reforsa makáas liu tan iha sistema justisa mos atu esklaresa ida ne'e didiak, tanba iha

---

<sup>4</sup> Entrevista ho Jose Texeira. Deputadu FRETILIN. Sesta, 15 Juñu 2012.

duni tendesia ida katak kazu la la'o bá oin to'o ita bá halo keixa iha Ministériu Públiku, dala barak kazu ne'e barak iha polisia nia liman sira koko atu rezolve oin-oin.

Reforsa instituisaun PNTL tomak ho integradu, FRETILIN tau importante liu maka halo formasaun ne'e tenki halo loloos ba idak-idak nia knaar, polisa tranzitu tenki hetan apoiu ne'ebé proporsional tanba polisia tranzitu ne'e halo atividade barak iha Dili maibé sira mak sai hanesan oan kiak fali. FRETILIN sei tau prioridade, presiza duni atu halo ida ne'e no depois tenki iha mos finansia ida, rekursu no materiais.

Reforsa ligasaun polisia ho comunidade nu'udar estratejia importante atu kombaté no prevene krime. Lider komunitariu mos tenki tama iha redi ne'ebé konstitui meiu ida atu reforsa lei no orden. Agora daudaun polisia halo sira nia serbisu ketak xefe suku no xefe aldeia halo sira nia serbisu ketak. Komprimisiu ne'ebé FRETILIN halo mos atu comunidade sira rasik bele hetan apoiu siguransa iha nivel aldeia ka suku husi comunidade rasik atu fo formasaun ne'ebé diak la'os atu kaer kro'at. Siguransa ne'e liu husi troka informasaun, pasa informasaun lalais liu bá polisia. Timor-Leste presiza iha baze comunidade para serbi katak polisia iha ne'ebá atu tulun sira, buka dalan atu bele reforsa lei no orden liu husi relasaun entre polisia ho lider komunitariu no comunidade la'os esklui comunidade maibé comunidade tama iha laran.

Unidade Polisia Maritima, investe iha sistema efikazu ida. Ró paradu hotu, ró boraisa ne'e teknolojia ida ultra pasa tiha ona. Tuir FRETILIN nia ánaliza, siguransa maritima halo koordinasaun ho F-FDTL tanba sei iha ameasa ida husi tasi ne'e la'os ameasa bai-bain ameasa ne'e polisia maritima labele halo buat ida. Ezemplu, ema lori ró husi Indonezia atu halo kontra-bandu mina ka ai, ne'e ameasa ida la'os internu maibé tipu ameasa externa, problema iha Timor-Leste agora iha kompetisaun ida makáas.

Presiza mos iha funsionariu públiku permanente instituisaun governu nian iha PNTL nia laran, ne'ebé bele tau matan bá instituisaun. Divizaun sira importante hotu iha funsionariu públiku ho polisia, ezemplu iha departamentu finansa nian hodi evita intervensaun komadante sira nian bá asuntu finansa nian. Enkuantu funsionariu públiku maka tenki aplika lei orsamentu nian tenki ezekuta ida ne'e presiza koordinasaun. Nune'e mos iha jestaun patrimoniun nian iha departamentu lojistika PNTL nia presiza funsionariu sivil sira. Kareta ne'ebé iha PNTL barak liu iha komandu nia liman maibé unidade no departamentu esensial sira la hetan no komandu distritais sira no eskuadra polisia subdistritu sira.

- **F-FDTL**

Vizaun forsa 2020<sup>5</sup> ne'e FRETILIN nia komprimisiu polítika dehan katak F-FDTL tenki fortaliza tan, tenki halo forte ho formasaun maibé formasaun ne'ebé efetivu liu no meius ne'ebé efetivu liu. implementasaun estratejia 2020 ne'e tenki halo agora ho hanoin bá nesiedade reais Timor-Leste nian. Planu forsa 2020, ne'e tenkeihare atualiza bá ameasa reais ne'ebé ezisti iha Timor-

---

<sup>5</sup> Estudu planu forsa 2020, ne'ebé ajusta Timor-Leste nian interese estratejiku ba seitor defeza nian dezvoltamentu, partikularmente forsa armada Timor-Leste nian FALINTIL-Força Defesa Timor-Leste (F-FDTL).

Leste. Ameasa reais ohin loron ne'e, ilegalidade husi fronteira, bele dehan seidak hare ilegalidade ne'ebé bele mosu iha Timor Leste. Timor Leste ohin loron sai hanesan bani-wen tur iha ne'ebá nakloke hela, animal barak, kriatura barak bele mai hobur liu-liu nehek. Osan mina rai, orsamentu bo'ot estadu Timor-Leste nian, razaun tanba saida maka iha ema barak husi liur tama halo buat oin-oin.

Identiku ho rai barak sira ne'ebé iha rekursu naturais, osan barak iha ekonomia nia laran sempre iha aproveitadores bá oportunidade ekonomiku. Ameasa balu bele hare iha duni no mosu daudaun. Agora, grupu migrante sira ne'ebé tama, ne'ebé iha sira nia rai rasik problema boot ona bá sira nia governu no sira nia governu mos hakarak sai husi sira nia rai. Grupusira ne'e iha tendensia atu organiza sira nia-an, problema kuandu sira organiza mos ita nia ema ne'ebé iha tendensia atu monu bá buat ne'e.

Tanba ne'e mak FRETILIN hare F-FDTL iha duni papel ida atu hare no hamatan bá fronteira tanba fronteira ne'e atu garante ita nia soberania husi influencia kriminalidade husi rai liur. La iha ema ida atu invade Timor-Leste, FRETILIN hare la iha forsa atu invade Timor-Leste maibé trafiku umanu lori prostituissun, droga iha tendensia makáas ona.

Timor Leste atu sai plataforma ida atu bá trafiku umanu bá Australia ne'e mos tenki tau matan makáas depois iha ita nia rejiaun sempre iha ameasa. Polítiku barak koalitia Timor-Leste la iha ameasa husi terorizmu, FRETILIN hare agora dadauk la iha ameasa husi terorizmu maibé tenki kuidadu tanba ne'e ameasa iha rejiaun ita mos la bele husik. Timor-Leste tama ASEAN lojikamente Timor-Leste tenki entegra iha ASEAN entaun rejiaun nia problem hanesan Timor-Leste nia problema. Timor-Leste presiza atualiza no aplika planu 2020 ne'e ho realidade no nesesidade bá realidade ne'ebé agora ita iha. Ne'e maka inportante ba FRETILIN atu halo avaliaissun saida mak ameasa interna no externa.

Timor-Leste tenki hare bá realidade tanba saida maka Timor-Leste presiza komponenti aeru? Ameasa saida? Tanba ne'e maka FRETILIN hanoin, aviaun funu nian Timor-Leste labele sosa, helikoptru ita presiza barak maibé helikoptru nia funsaun lolos de'it relaciona ho siguransa hanesan siguransa sivil atu tun iha kestaun dezastre nian no serbisu emerjensia seluk. Timor-Leste presiza de'it helikoptru ne'ebé sukat ho ita nia kapasidade finanseira tanba setor seluk prioridade bá Timor-Leste. Hare bá planu forsa 2020, komponenti aeru ne'e ambisiozu ne'ebé presiza atualiza tuir Timor-Leste nia realidade no nesesidade.

## **2. Partidu CNRT<sup>6</sup>**

Reforma bá seitor siguransa nian mak reforma ne'e termu dezeina instituisaun no rekursu umanu. Reforma bá setor siguransa iha instituisaun rua maka PNTL ho F-FDTL ne'ebé CNRT kaer fila fali governu hadia diak liu tan. Termu Instituisaun signifika katak dezenvolve instituisaun ida profesional liu. Halo reforma rekursu umanu instituisaun atu aumenta nia

---

<sup>6</sup> Entrevista ho Duarte Nunes. Deputadu Parlamentu Nasional (PN), Bankada CNRT no hanesan mos Xefe Koimisaun B PN ba Asuntu Defeza, Siguransa no Negosiu Estranjeiru nian. Tersa, 29 Maiu 2012.

kapasidade operacional para depois halo prevensaun bá krime, investigasaun, siguransa públika no kontrola nian.

- **PNTL**

Tuir responsavel setor defeza no siguransa partidu CNRT nian katak instituisaun ne'ebé profesional presiza dezenvolve iha ema, fasilidade para nia bele sai profesional tanba buat rua ne'e liga malu. Tuir CNRT nia hanoin ne'e presiza halo tanba hare husi PNTL barak maka mai husi eis polisia Indonezia no to'o ona tempu pasa bá reforma. Lei ne'ebé maka fo reforma bá servidor estadu bele mos aplika ona bá polisia. Bainhira iha ona sira seluk bele troka, ida ne'e maka reforma ne'ebé CNRT hanoin atu halo.

Importante polisia presiza hakbesik-an bá comunidade durante ne'e la iha tanba seidauk dezenvolve polisia komunitaria. Maske nune'e, governu halo ona akordu ho Japaun, Nova Zelandia oinsa maka atu dezenvolve rekursu hirak ne'e. Karik governu ne'e kontinua CNRT maka governa, programa ne'e sei la'o bá oin tanba atu dezenvolve polisia komunitaria nune'e bele sosializa bá regra no lei bá sidadaun hotu-hotu.

Instituisaun ida tenki iha kapasidade entaun polisia espesial ka polisia operacional atua iha situasaun saida de'it maibé fo de'it pistola atu halo atuaun. Nia tenki sente iha kapasidade atu halo atuaun kualker saida de'it, CNRT hanoin investe bá polisia espesial. Timor-Leste nu'udár nasaun soberania ida tenki kontra eventu saida de'it maka dehan polisia. Tanba iha mundu ne'e mafia droga sira ne'e mai armadu la'os mai ho tudik atu defende nia-an mai ho kilat.

CNRT hare polisia kaer kilat la'os atu tiru nia populasau, CNRT hanoin ne'e la loos. Agora polisia iha kilat atu defende saida de'it maka akontese, ema se de'it mai atu estraga. La'os F-FDTL de'it, polisia mos tenki iha situasaun ne'ebé presiza hodi nune'e bele serbisu hamutuk. CNRT hare katak kilat bele hadia diak liu tan, durante ne'e iha lamentasaun husi parte fronteira kona-bá kilat ne'ebé a'at. Maibe Timor-Leste presiza iha lei regula kona-bá kilat nian no transparansia.

- **F-FDTL**

Instituisaun defeza nian durante ne'e lao diak maibé CNRT hanoin atu oinsa mak ita prepara ema bá halo misaun manutensan da paz nian, hanesan misaun Nasoens Unidas nian iha rai liur. Inklui misaun sira iha rai laran hanesan apoiu bá situasaun emerjensia ruma no dezastre naturais.

Setor defeza to'o 2015. forsa tenki professional, forsa konvensional hatudu kapasidade ne'e profesional. Lei nian, CNRT sei kompleta lei sira, bazeia bá lei ne'e maka dezenvolve. Kooperasaun entre F-FDTL ho PNTL presiza klaru tenki tau bá lei. Lei ne'e maka implementa labele ses husi lei.

To'o 2015, primeiru, CNRT hare katak efetivu husi F-FDTL barak mai husi veteranus. CNRT ajusta ona para veteranus adapta bá vida sivil. CNRT nia vizaun ne'ebé prepara ona ate 2015 oinsa maka sira veteranus presiza deskansa, governu fo assistensia de'it ona para sira adapta ona bá vida sivil maibé ho estatutu ka lei ida mak regula.

CNRT hanoin oinsa maka dezenvolve fetu F-FDTL tanba fetu sira ne'e tenki dezenvolve para sira kaer área administrasaun, mane sira bá área operacional nian. CNRT dezeina ona to'o 2015 bá dezenvolve instituisaun F-FDTL. Nune'e to'o 2020 forsa ida ne'ebé preparadu ho kapasidade no profesional tuir vizaun planu forsa 2020.

Iha setor siguransa, CNRT hare iha fator barak la'os instituisaun siguransa mesak maibé instituisaun seluk bele kontribui. Timor-Leste presiza hanoin parte intelijensia nian. CNRT presiza dezenvolve diak tanba sira nia kontribuisaun para oinsa maka bele fo informasaun, polisia bele atua tuir nia knáar. CNRT hare ne'e inportante. CNRT hanoin iha parte siguransa intelijensia presiza tebes tanba Timor-Leste nia fronteira nia sei fraku no risku makáas bá atividade ilegal. Problema boot iha sosiedade nia laran ne'e, dezempregu sira aproveita hodi halo buat ne'ebé ilegal, droga tama tanba intelejensia ne'ebé la suficiente entaun ema aproveita tama ne'e maka ita iha perigu barak liu maka iha liña fronteira.

CNRT sei dezenvolve forsa armada iha komponenti naval nian, importante tanba agora iha situasaun ne'ebé la'os funu maibé Timor-Leste nia fronteira maritima iha mina, iha ikan lolos Timor-Leste halo defeza ba illegal sira tama, entaun ita presiza dezenvolve facilidade ne'ebé sira presiza ema ne'e mos tenke preparadu para uza facilidade atu defende ita nia soberania.

CNRT sei dezenvolve komponenti aeru nian maske ita seidak iha posibilidade maibe vizaun katak tempu ruma Timor-Leste presiza iha komponenti aeru iha forsa armada ho facilidade ida naton hodi apoiu bá serbisu emerjensia sira no dezastre naturais. Apoiu komponenti terestre no naval iha sira nia operaun, karik presiza komponenti aeru.

Kooperasaun bilaterais, CNRT hare katak importante tebes Timor-Leste presiza serbisu hamutuk ho nasaun seluk liu-liu nasaun vizinu. Kooperasaun ne'ebé foka bá treinamentu espesialidade nian iha área hotu nune'e Timor-Leste bele garante forsa polisia no forsa armada ne'ebé profesional ho kapasidade rasik. CNRT hare katak rekursu umanu fator determinante iha instituisaun defeza no siguransa tanba ne'e tenki dezenvolve rekursu umanu no kapasitasaan profesional.

### **3. Partidu Demokratiku (PD)<sup>7</sup>**

Tuir PD nian programa, setor defeza no siguransa sai hanesan segundu prioridade iha dezenvolvimentu Timor-Leste. Garantia estabilidade iha Timor-Leste, setor defeza no siguransa presiza hamri'ik mesak ho nia kapasidade institucional nian ho profesional. Dezenvolvimentu

---

<sup>7</sup> Entrevista ho Antonio da Conceição. Komisariu Polítika Partidu Demokrátiku. Sesta, 01 Juñu 2012.

setor rua ne'e, PD hare katak instituisaun defeza no siguransa iha evolusaun makaás iha desenvolvimentu Timor-Leste nian.

Iha funcionamentu instituisaun nian, lei no rekusu umanu sai hanesan asunto importante ida presiza fortifika no dezenvolve tuir nesesidade Timor-Leste nian. Maibé dezafiu ida maka F-FDTL no PNTL sei iha kompetisaun bá nia desenvolvimentu no koloka instituisaun PNTL sai hanesan número segundu ka minimiza tiha PNTL. PD hare katak presiza iha balansu bá desenvolvimentu instituisaun rua ne'e.

- **F-FDTL**

PD sei konsentra bá desenvolvimentu instituisaun nian no kuadru legal sira bá funcionamentu instituisaun nian. Dezenvolvimentu instituisaun sei foka bá estrutura forsa armada nian, tarefa divizaun forsa armada nian, distribuissauun responsabilidade. Instituisaun ne'ebé forte no profesional tenki respeitu hirarkia komandu no tuir lei no orden komandu nian.

Dezenvolve rekursu umanu ne'ebé profesional iha ámbitu forsa armada nian ne'ebé bele hala'o misaun konstituisaun nian. Habelar formasaun rekursu umanu nian iha área especialidade sira hanesan enjeneria, operasaun no sira seluk no atualiza tuir desenvolvimentu teknolojia ne'ebé la'o dadauk. Forsa armada ne'ebé profesional bele partisipa iha operasaun manutensaun da paz iha mundu, forsa armada sai hanesan ponte kooperasaun internasional bá diplomasia Timor-Leste nian iha mundu.

Dezenvolvimentu infraestruturá bá setor defeza nian seidauk akomoda nesesidade forsa armada nian. PD sei tau asunto ida ne'e hanesan asunto importante bá desenvolvimentu forsa armada nian. Hanesan kazerna bá efetivu forsa armada sira, forsa sira labele dook husi sira nia familia, PD konsidera kondisaun ida ne'e, presiza dezenvolve no importansia bá planu desenvolvimentu instituisaun forsa armada nian.

Timor-Leste iha área marítima ne'ebé luan no riku soim ne'ebé barak iha tasi Timor. Presiza komponenti naval ne'ebé naton hodi halo vijilansia bá riku soim sira iha tasi nian, Timor-Leste iha mina no gas boot tebe-tebes iha tasi Timor, ikan ne'ebé potencia tebes bá finansiamentu desenvolvimentu Timor-Leste. Atividade ilegal iha tasi kontinua movimenta hodi naok riku soim hanesan ikan tanba siguransa marítima ne'ebé frazil. Tanba ne'e presiza atualiza komponenti naval ho teknolojia sira no hasa'e kapasidade rekursu umanu ho formasaun especialista sira. Presiza komponenti naval ida ho ekipamentu ne'ebé diak no bele halo patrullamentu iha kosta sul ho ekipamentu pezadu sira hodi kontrola riku soim sira. Dezenvolve komponenti naval ida profesional ne'ebé bele halo misaun manutensaun da paz nian ne'ebé nesesidade duni bá PD atu dezenvolve. Maibé presiza mos kondisaun importante seluk hanesan portu bá komponenti naval nune'e ró bele para no halo manutensaun.

PD sei dezenvolve komponenti aeru iha forsa armada nian, ne'ebé bele fo protesaun bá riku soim sira tanba kapasidade komponenti naval nian seidauk naton atu halo patrulamentu kobre

tasi Timor nian. Atu atinzi vizaun ida ne'e prezisa mos kondisaun bazika bá komponenti ida ne'e nian dezvoltamentu.

Iha ámbitu kooperasaun bilaterais no multilaterais nian, nasaun viziñu sira importante atu serbisu hamutuk. Kooperasaun ida ne'ebé diak tenki estabese liu husi akordu ruma ne'ebé bele ajusta Timor-Lesta nian interese, liu husi formasaun no treinamentu bá forsa armada sira no ezersisiu konjuntu ne'ebé Timor-Leste bele hetan esperiensiá operasiunal sira.

- **PNTL**

PD nia programa, instituisaun PNTL prezisa reforsa institusiunal iha asuntu administrasaun nian, investigasaun, no divizaun sira seluk iha komandu PNTL nia laran. Dezenvolve polisia komunitaria ne'ebé hela ho komidade, partisipa iha atividade komidade nian no integra iha estrutura governu lokal nian inklui partisipa iha atividade seluk hanesan edukasaun "hanorin" iha eskola sira bá materia edukasaun sivika no direitus umanus nian. Asuntu ida ne'e importante polisia bele transforma mentalidade disiplina nian bá komidade no estudante sira iha nivel ensinu nian tuir lei no orden. Integra polisia iha sistema funsiunamentu governu lokal nian, la'os atu halo duplikasaun serbisu maibé koordenaun serbisu ekipa nian iha atendimentu públiku.

Dezenvolve polisia marítima ida ne'ebé bele garante siguransa pública iha área kosta sira husi atividade ilegal no atualiza tuir teknolojia sira. Apoiu fasilidade ho ekipamentu ne'ebé diak ho kondisaun portu ne'ebé naton bá operaun unidade polisia marítima nian iha área kosta tasi Timor. Prezisa portu propriu ida bá polisia marítima atu halo operaun bá ró sira ne'ebé polisia marítima iha. Kondisaun ida ne'e inportante tebes bá polisia marítima atu ezerse nia misaun iha área kosta tasi Timor nian.

Iha unidade espesial polisia nia, prezisa fasilidade ne'ebé naton no kondisaun sira seluk. Unidade espesial prezisa iha kilat ne'ebé diak, kilat ita prezisa nian difinisaun kilat labele asosia ho funu maibé hanesan meius ida atu normaliza situaun. Unidade Polisia Fronteira (UPF) prezisa iha kilat maske ita defini "demilitarizasaun" iha fronteira maibé Timor-Leste prezisa asegura nia fronteira husi atividade ilegal sira hanesan droga, trafiku umanu, komersiu ilegal husi grupu krime organizadu sira.

#### **4. Partidu Unidade Nasional (PUN)<sup>8</sup>**

- **F-FDTL**

Primeiru, PUN sei formula política defeza nasional ida tenki klaru tanba to'o ohin loron seidak iha política defeza no siguransa ida klaru hodi defini interese estratejiku Timor-Leste nian no kapasidade postura forsa ne'ebé prezisa hodi atinzi Timor-Leste nia interese. Timor-Leste iha planu forsa 2020, no mos iha Lei nú. 02/2010 Lei Siguransa Nasional no Lei nú 03/2010 Lei

---

<sup>8</sup> Entrevista ho Francisco Lemos dos Santos. Kandidatu Ministru Defeza, Partidu Unidade Nasional. Segunda, 28 Maiu 2012.



Defeza Nasional, maibé planu forsa 2020, PUN hare katak dokumentu hare husi estrutura la serve bá polítika defeza nasional ida tanba iha ne'ebá la defini klaru Timor-Leste nian interese estratejiku. Forsa 2020 ne'e hanesan sensus, nia identifika maka problema maibé sidauk identifika klaru oinsa ita atu responde kona-bá problema ne'e. Iha mos lei siguransa no defeza 2010 ne'ebé nia objetivu atu konduz lalaok F-FDTL nian. Agora governu ida ne'e koalía fali forsa 2020 no lei sira ne'e hanesan politika defeza nasional, ne'e sala. Tanba ne'e, PUN sei defini polítika defeza klaru, hodi estabelese postura forsa ida realistiku hodi responde bá nesiedade ka interese estratejiku estadu Timor- Leste nian.

Segundu, PUN sei dezenvolve estrutura forsa F-FDTL ida ne'ebé maka valansu no fleksivel. Bá ohin loron iha problema boot iha konseitu forsa nian ne'ebé dala barak rona husi Ministru Defeza no Sekretariu Estafu Defeza koalía katak forsa ki'ik bá nasaun kiik. Ho lian seluk ita dehan katak Timor-Leste ne'e nasaun kiik oan ita presiza forsa kiik oan, ida ne'e konseitu ida sala, tanba iha formulasaun planu bá polítika bá defeza estadu nian postura forsa ne'e depende bá interese estratejiku estadu ida ne'e nian, agora tanba konseitu sala tiha ona entaun pratika mos sala. Ezemplu, komponenti naval maski ita nia nasaun ki'ik oan mas ita nia interese atu aseguru marítima ne'e makáas, entaun la'os presiza *small Navy* mas komponenti ne'ebé naton hodi aseguru ita nia interese estratejiku ida ne'e.

Komponenti naval dadaun ne'e iha ró patrullamentu maibé labele halo operasaun iha tasi Timor, inves bele sosa ró ne'ebé bele halo patrullamentu iha Timor-Leste nia marítima maibé sosa fali ró ne'ebé mak ki'ik labele halo patrullamentu to'o tasi Timor ne'ebá. Ne'e tanba Timor-Leste nia konseitu, hanoin ne'e sala tiha ona, Timor-Leste hanoin ne'e forsa ki'ik, lae. Ne'e depende bá interese estratejiku. Marítima ne'e boot, presiza komponenti naval ne'ebé maka bele aseguru interese estratejiku ne'e. Komponenti naval ne'e esensial tebe-tebes, iha interese marítima boot tebe-tebes, tanba tinan-tinan governu mos halo estudu ida katak tinan-tinan Timor-Leste lakon \$36 milloens tanba peska ilegal, tama mai naok riku soin.

Timor-Leste nia komersiu depende mos bá tasi, importasaun sasan husi portu, ita presiza asegura. Destinu nasaun ne'e depende bá tasi tanba finansamentu bá dezenvolvimentu Timor-Leste depende bá iha mina ho gas ne'ebé maka husi tasi Timor. Komponenti naval seidaok halo patrullamentu iha tasi Timor hodi asegura riku soin sira ne'e. PUN nian senariu ida, agora iha grupu terorizmu makáas iha Azia, hanesan Filipina, Indonezia makáas tebe-tebes, PUN hamosu senariu ida katak karik sira hamosu instabilidade iha tasi Timor ne'ebá, Timor-Leste nia plataforma Greater Sun Rise, plataforma Bayu-Undan ne'e produs mina ho gas. Dezenvolvimentu estadu Timor-Leste depende bá rekursu hirak ne'e. Tanba ne'e, presiza komponenti naval ida ne'ebé naton ho kapasidade no ekipamentu sira hanesan kilat, ró ne'ebé bele halo patrullamentu iha tasi Timor.

Terseiru, dezenvolve kurikulum bá Institutu Defeza Nasional (IDN), agora Timor-Leste iha ona Ministeriu Defeza maibé to'o ohin loron IDN seidaok iha kurikulum. IDN la'os kursu deit kumbina kona-bá kombate no tatika operasaun sira maibé sei kumbina mos kurikulum kona-bá kursu estratejiku sira seluk. Ezemplu, forsa ne'ebé profesional la'os deit iha kuiñesementu bá tatika kombate no operasaun nian maibé iha mos kuiñesementu kle'an evolusaun iha mundu tomak.

Ezemplu, kursu relasaun internasional, estudu siguransa, intelejensia no polítika. Nune'e forsa armada bele profesional hodi partisipa iha misaun manutensaun da paz iha mundu. Ne'ebe forsa ne'e la'os halo kombate de'it maibé forsa ida ne'ebé bele halo konstrusaun no rehabilitasaun. Tanba forsa ne'ebé halo kombate, Timor-Leste nia kapasidade la to'o ne'ebá.

Kuartu, estabese sistema informasaun militar ne'ebé sofisticadu iha sistema informasaun intelejen militar nian, agora ita iha de'it sistema informasaun militar. PUN sei estabese no hari'i, agora ita iha ona instituisaun maibé seidak iha sistema atu hala'o. PUN sei halo estudu kona-bá asuntu estratejiku no intelejensia, oinsa intelejensia hala'o sira nia knaar ho kapasidade nune'e bele fo informasaun bá lider sira hodi halo formulasaun estratejia, operasaun ka polítika defeza. PUN mos sei halo integrasaun sistema informasaun militar iha sistema nasional intelejensia, buat rua ne'e grupu ajente intelejensia hotu maibé sira hala'o nia knaar sei halo koordenaun bá malu. Ida ne'e seidak, agora ne'e ida-idak halo ninian ketak, PNTL nian ketak, SNI mos ketak no militar. PUN sei integra ida ne'e nune'e labele iha kompetisaun.

- **PNTL**

Premeiru, Instituisionaliza polisia komunitaria. Problema ne'ebé PNTL hasoru tanba failansu governu nian, Lei Organika PNTL 16/2009 defini lolos tiha ona katak polisia ho karakter komunitaria mas iha pratika hamosu polisia ida hanesan fali semi militar, tanba seidak iha polítika siguransa ida ne'ebé klaru. Diferensia entre interese no implementasaun. PUN sei halo revizaun bá ida ne'e, oinsa ita bele hakbesik polisia bá komuidade ho dalan halo revizaun bá lei organika PNTL nian, iha ne'ebá defini kompozisaun PNTL oin-oin, iha UEP, UPM, UPF, SIP, SIC. UEP nia serbisu iha duplikasaun entre BOP no unidade seluk, sira nia papel ne'e militar kombate. UEP kaer kilat boot, PUN la konkorda tanba ne'e responsabilidade militar nian no ida ne'e la nesesariu bá PNTL, ida ne'e hamosu konfuzsaun iha komuidade nia le'et, polisia ho militar atu hanesan.

Segundu, PUN sei halo revizaun bá lei organika no revizaun kurikulu formasaun bá polisia, ne'ebé nia orientasaun bá polisia komunitaria. Agora dadauk ne'e iha formasaun halai liu treinamentu kombate hanesan militar. Los, presiza treinamentu fiziku maibé la'os treinu kombate hanesan militar. PUN sei hamosu polisia ida komunitaria duni, la'os deit sira hatene de'it tatika kombate. Importante liu hanorin polisia ida hatene oinsa halo rezolusaun konfliktu, mediasaun, hakbesik komuidade, komunika ho komuidade, PUN sei hamosu ida ne'e iha kurikulu formasaun PNTL nian.

## Sumariu

### 1. Pontu Xave Partidu Polítiku Nia Programa

Fundasaun Mahein (FM) nia sumariu bá partidu polítiku sira nia polítika setor defeza no siguransa nian, liu-liu partidu potensia sira. Konklui katak partidu polítiku sira koalia no fo prioridade bá setor defeza no siguransa maibé iha polítika ne'ebé partidu polítiku sira apresenta la difini substansia no vizaun bá dezvoltimentu setor defeza no siguransa nian.<sup>9</sup> Maske iha partidu polítiku balu difini interese estratejiku sira bá setor defeza no siguransa maibé barak liu, fo prioridade teknikamente oinsa fo assistensia bá forsa armada no forsa polisial.

Iha setor defeza nian, partidu polítiku sira iha interpretasaun balu bá planu forsa 2020 no vizaun polítika sira bá dezvoltimentu setor defeza nian. Programa prioridade sira, partidu polítiku difini hodi dezenvolve diak liu tan forsa armada ho vizaun estratejiku sira. Maibé partidu balu la difini sasukat sira iha forsa armada ninia dezvoltimentu.

FM sublina bá partidus polítika sira nia programa ne'ebé sira difini bá dezvoltimentu instituisaun nian ne'ebé iha pontu hirak mai ne'e:

#### a. Setor Defeza

- Dezenvolve instituisaun forsa armada ida profesional ho kapasidade operacional ida propriu tuir evolusaun forsa armada nian.
- Hadia kualidade rekursu umanu ne'ebé profesional iha komponenti hotu ne'ebé sei sai hanesan dezafiu ida iha instituisaun forsa armada nian.
- Investe bá infraestrutura ne'ebé diak no hatur hanesan prioridade ida ne'ebé nesesariu bá forsa armada.
- Investe mos bá facilidade sira ne'ebé fasilita forsa armada nia serbisu iha komponenti hotu.
- Haforsa kooperasaun internasional ho estadu sira viziñu no estadu sira rejiaun nian.
- Partidu sira sei difini interese estratejiku sira tuir ameasa sira iha maritima nian no terestre.
- Dezenvolve komponenti aeru iha forsa armada nian ho kondisaun ida naton tuir nesesidade ne'ebé Timor-Leste presiza.

---

<sup>9</sup> Entrevista ho Antonio Freitas. Diretor Dili Institute Studies International Strategic. Segunda, 18 Maiu 2012.

- Dezenvolve kurikulu formasaun forsa armada nian iha materia estudu estratejiku nian la'os deit formasaun tatika operasaun nian.

b. **Setor Siguransa**

- Dezenvolve instituisaun PNTL sai hanesan instituisaun ida ne'ebé hatur lei no orden tuir mandatu konstituisional.
- Reforma bá lei sira iha instituisaun PNTL.
- Dezenvolve no instituisionaliza polisia komunitaria.
- Revizaun bá kurikulu formasaun PNTL nian.
- Hamosu lei reforma nian bá elementu PNTL ne'ebé pasa ona reforma.
- Investe bá infraestrutur ne'ebé diak.

**2. Dezafiu Sira Ne'ebé Presiza Konsidera**

Dezafiu inportante sira iha setor defeza no siguransa nian, partidu potencia ne'ebé iha possibilidade atu kaer governu iha periodu 2012-2017. Hanesan pontu rekomendasaun husi governante setor defeza no siguransa nian konsidera katak iha progresu, iha mos dezafiu balu presiza governu foun toma responsabilidade no konsidera.

a. **Setor Defeza**

Pontu konsiderasaun sira ne'ebé sai hanesan dezafiu iha Sekretariu Estadu Defeza (SED) nia mandatu ne'ebé FM hakerek iha pontu hirak tuir mai, nu'udar rezultadu entrevista no diskusaun ho Sekretariu Estadu Defeza Julio Tomas Pinto, ne'ebé konsidera pontu dezafiu sira governu foun presiza tau iha konsiderasaun.<sup>10</sup>

- Timor-Leste iha ona kooperasaun bilaterais no multilaterais ne'ebé diak tebe-tebes maibé seidauk iha akordu formal ruma no seidauk hetan aprovasaun husi parlamentu nasional.
- Esforsu ida husi SED revizaun bá lei organika F-FDTL konabá estatu forsa armada ne'ebé sei hanesan esbosu lei ida no seidauk aprova iha konsellu ministru no governu foun presiza konsidera.
- Portu temporariu bá komponenti naval ne'ebé seidauk finaliza.

---

<sup>10</sup> Entrevista ho Julio Tomas Pinto. Sekretariu Estadu Defeza. Sesta, 15 Juñu 2012.

- Kontinua dezenvolve planu dezenvolvimentu forsa nian ne'ebé interpretasaun mai husi estudu planu forsa 2020.
- Dezenvolve diak liu tan Institutu Defeza Nasional (IDN) ne'ebé nia mandatu halo analiza bá dezenvolvimentu forsa armada nian no interese estratejiku sira bá dezenvolvimentu setor defeza.
- Presiza difini lolos tarefa koordenasaun sira iha lei siguransa nasional nian ne'ebé koalia kona-bá política siguransa nasional integradu.

**b. Setor Siguransa**

Pontu konsiderasaun sira ne'ebé sai hanesan dezafiu iha SES nia mandatu ne'ebé FM hakerek iha pontu hirak tuir mai, nu'udar rezultadu intervista no diskusaun ho Asesor Sekretariu Estadu Siguransa nian Anacleto Ribeiro, ne'ebé konsidera pontu dezafiu sira governu foun presiza konsidera.<sup>11</sup>

- Dezenvolve no hamosu lei kona-bá autoridade nasional maritima nian ne'ebé nian kompozisaun kompostu husi UPM-PNTL, Komponenti Naval F-FDTL, Bombeirus, Alfandega, Karantina, Meiu Ambiente, Migrasaun no Dirasaun Dezastre nian.
- Estabelese lei kona-bá protesaaun sivil nian no tarefa sira seluk ne'ebé konduta dirasaun protesaaun sivil nian serbisu.
- Infraestruturá bá instituisaun PNTL ne'ebé to'o oras ne'e seidak kompletá iha komandu distrital, unidade polisia sira no postu sira iha eskuadra polisia no fasilidade sira.
- Dezenvolve no halo estudu kona-bá planu dezenvolvimentu PNTL nian hanesan "*white paper*" ka livru mutin bá PNTL hanesan matadalan bá dezenvolvimentu instituisaun PNTL nian.
- Hadia diak liu tan dirasaun serbisu sira iha SES nian responsabilidade hanesan Dirasaun Nasional Siguransa Edifisiu Públiku (DNSEP) no Serbisu Migrasaun nian.

---

<sup>11</sup> Intervista ho Anacleto Ribeiro. Asesor Sekretaria Estadu Siguransa. Sesta, 22 Juñu 2012

## Referensia

### **Intervista:**

Intervista ho Jose Texeira. Deputadu FRETILIN. Sesta, 15 Juñu 2012.

Intervista ho Duarte Nunes. Deputadu Parlamentu Nasional (PN), Bankada CNRT no hanesan mos Xefe Komisaun B PN ba Asuntu Defeza, Siguransa no Negosiu Estranjeiru nian. Tersa, 29 Maiu 2012

Intervista ho Antonio da Conceição. Komisariu Política Partidu Demokrátiku. Sesta, 01 Juñu 2012.

Intervista ho Francisco Lemos dos Santos. Kandidatu Ministru Defeza, Partidu Unidade Nasional. Segunda, 28 Maiu 2012.

Intervista ho Julio Tomas Pinto. Sekretariu Estadu Defeza. Sesta, 15 Juñu 2012.

Intervista ho Anacleto Ribeiro. Asesor Sekretaria Estadu Siguransa. Sesta, 22 Juñu 2012

Intervista ho Antonio Freitas. Diretor Dili Institute Studies International Strategic. Segunda, 18 Maiu 2012.

### **Dokumentu:**

Konstituisaun Repúblika Demokrátika Timor-Leste

CNE nian Públikasaun kona-bá Partidu Polítiku iha Eleisaun Parlamentar 2012 ba Periodu 2012-2017. <http://www.cne.tl/includes/publications/Parliament%20Election%202012.pdf>